

Evening Dogri (NSD) News

11-July - 2026

खास खबरां

1. भारत ते न्यूजीलैंड अपने सरबंधें गी अगड़ा बदाइयै सामरिक सांझ-भ्याली च बदला करदे न। दौनें मुलखें 2030 तोड़ी दपक्खी कारोबार गी 2 गुणा करियै 35 ज्हार करोड़ रपे तोड़ी पजाने दा लक्ष्य रक्खेआ।
2. प्रधानमंत्री नरेन्द्र मोदी होरें ऑकलैंड च प्रवासी भारतीयें गी सम्बोधित करदे होई आखेआ जे न्यूजीलैंड च भारतीय समुदाय दौनें मुलखे बशकार सांझी यात्रा दा मुख् हिस्सा ऐ।
3. रक्षा मंत्री राजनाथ सिंह होरें मुलखै च तयार स्टैल्थ युद्ध पोत INS महेन्द्र गिरी गी नौ-सेना च शामिल कीता ऐ। उ'नें आखेआ जे मुलखे इक मजबूत आत्मनिर्भर ते भविष्य लेई रक्षा बल तयार करा रदा ऐ।
4. ब्रिक्स दे मंत्री स्तरीय घोषणा-पत्र 2026 च ट्रांसपोर्ट क्षेत्र च प्रोद्योगिकी गी मजबूत करने ते नमियें काङ्ग्रे च साथ-सहयोग गी अपनाने दा फैसला कीता गेआ ऐ।
5. समुन्द्री तूफान BAVI कारण जापान दे ताईवान च स्कूल बंद ते फ्लाईटें गी रद्द करी दिता गेआ ऐ।
6. तीरअंदाजी विश्व कप दे चौथे गेड़ च भारतीय महिलाएं गी टीम नै कम्पाउंड वर्ग च चांदी दा तगमा जित्तेआ ऐ।

<><><><><><>

India New Zealand

प्रधानमंत्री नरेन्द्र मोदी ते न्यूजीलैंड दे प्रधानमंत्री Christopher Luxon हुंदे बशकार ऑकलैंड च होई गल्लबात मगरा भारत ते न्यूजीलैंड अपने सरबंधें गी अगड़ा बदाइयै सामरिक सांझ-भ्याली च बदला करदे न। दौनें मुलखें 2030 तोड़ी दपक्खी कारोबार गी 2 गुणा करियै 35 ज्हार करोड़ रपे तोड़ी पजाने दा लक्ष्य रक्खेआ। एदे शा पैहले इक उच्ची स्तरीय प्रतिनिधिमंडल च गल्लबात करदे होई प्रधानमंत्री मोदी होरें आखेआ जे न्यूजीलैंड दा दौरा दपक्खी सरबंधें गी होर मजबूत करोग। प्रधानमंत्री होरें आखेआ जे भारत ते न्यूजीलैंड हिंद प्रशात संभाग च शांति- सुरक्षा ते स्थिरता गी होर मजबूत करने च अहम भूमिका निभाई सकदे न। श्री मोदी होरें गर्म-जोशी कन्नै उन्दा सोआगत करने पर न्यूजीलैंड दे लोकें ते नेतृत्व दा आभार व्यक्त करदे होई आखेआ जे 4 दहाके बाद भारतीय प्रधानमंत्री दा न्यूजीलैंड दा दौरा दौनें मुलखे बशकार बद्धी सांझ-भ्याली दा प्रतीक ऐ। दौनें मुलखे बशकार मुक्त बपार समझौते दी सराहना करदे होई श्री मोदी होरें इस समझौते दी प्रक्रिया गी घट्ट समें च पूरा करने लेई प्रधानमंत्री लुक्सन ते न्यूजीलैंड दी सरकार दी सराहना कीती। इस मौके पर

बोलदे होई न्यूजीलैंड दे प्रधानमंत्री होरें घोषणा कीती जे भारत ते न्यूजीलैंड मुख-मुख क्षेत्रें च साथ-सहयोग गी होर बदाने लेई इक सामरिक सांझ-भ्याली गी स्थापित करगंन।

<><><><><><>

PM New Zealand Tour

प्रधानमंत्री नरेन्द्र मोदी होरें न्यूजीलैंड दा अपना दंडु दिनें दा दौरा मुकम्मल करियै मुख्य वापस आ करदे न 4 दहाके कोला मते अरसे दे बाद कुसै भारती प्रधानमंत्री दी न्यूजीलैंड दी एह पैहली यात्रा ही जिन्नै दौनें मुखें बशकार दपक्खी सरबंधें गी खरी मजबूती दिती ऐ। इस यात्रा दौरान प्रधानमंत्री मोदी होरें न्यूजीलैंड दे प्रधानमंत्री Christopher Luxon हुंदे नै गल्लबात कीती। दौनें नेताएं रक्षा-सैलसफा- खेडु- आपदा प्रबंधन ते दुद्ध ते पशुपालन दे क्षेत्र च 5 समझौतें पर दस्तखत कीते न। इस यात्रा दा मुख आकर्षण ऑकलैंड दे स्पार्क एटीना च आयोजित समुदायिक कार्यक्रम हा जेहदे च भारती प्रवासी समुदाय दे 10 ज्हार कोला मते सदस्यें हिस्सा लैता। प्रधानमंत्री Luxon होरें सभा गी सम्बोधित करदे होई भारत गी इक भरोसेमंद दोस्त दस्सेआ ते न्यूजीलैंड दी तरक्की च भारतीय समुदाय दे योगदान दी सराहना कीती।

<><><><><><>

Defence Minister

रक्षा मंत्री राजनाथ सिंह होरें आखेआ जे मुख्य पारम्परिक रक्षा प्रणाली ते आधुनिक तकनीक गी होर विकसित करदे होई इक मजबूत आत्मनिर्भर ते भविष्य लेई रक्षा बल तयार करा रदा ऐ। उंनें आखेआ जे भविष्य च युद्ध आर्टिफिशल इंटेलिजेंस ते होरनी आधुनिक तकनीकें दे कन्नै लड़ेआ जाग- लेकिन युद्ध च जित्त म्हेशा मुख्य दे निश्चय- बहादुर जोआनें ते फौजी ताकत दे दम उप्पर गै हासल कीती जाग। रक्षा मंत्री होरें आखेआ जे तकनीक ते पारम्परिक फौज च मजबूती इक-दूए दे पूरक न ते भारत इनें दौनें च महारत हासल करने लेई वचनबद्ध ऐ। रक्षा मंत्री होरें ए गल्ल मुखें च तयार स्टैल्थ युद्ध पोत INS महेन्द्र गिरी गी नौ-सेना च शामिल करदे होई आक्खी। एह समारोह विशाखापट्टनम च आयोजित कीता गेदा हा।

<><><><><><>

Gadkari BRICS

सिड़क ट्रांस्पोर्ट मैहकमे दे केन्द्रीय मंत्री नितिन गडकरी होरें अज्ज महाराष्ट्रा दे नागपुर च ब्रिक्स मुल्ले दे ट्रांस्पोर्ट मंत्रियें दी त्री बैठक दी अध्यक्षता कीती। बैठक मगरा पत्रकारें कन्नै गल्लबात करदे होई श्री गडकरी होरें आखेआ जे प्रतिनिधियें प्रदूषण मुक्त तकनीकें ते वैकल्पिक जैव ईंधन दा इस्तेमाल करियै सिड़क-रेल - हवा ते जलमार्गें गी कार्बन सवा मुक्त करने दे प्रयासें पर चर्चा कीती। उ'नें आखेआ जे नमियें काडुं ते तकनीकें गी ब्रिक्स दे मिम्बर मुल्ले कन्नै सांझा कीता जा' करदा ऐ तां जे इक मजबूत लचीला ते टिकाऊ सरिस्ता ट्रांस्पोर्ट क्षेत्र च स्थापित कीता जाई सकै। उ'नें अगो आखेआ जे ब्रिक्स दे मंत्री स्तरीय घोषणा-पत्र 2026 च ट्रांस्पोर्ट क्षेत्र च प्रोद्योगिकी गी मजबूत करने ते नमियें काडु च साथ-सहयोग गी अपनाने दा फैसला कीता गेआ ऐ।

<><><><><><>

World Population Day

अज्ज “विश्व जनसंख्या दिवस” मनाया जा'रदा ऐ। सेहत ते परोआर कल्याण मैहकमे दे मंत्री जगत प्रकाश नड्डा होरें परोआर नियोजन ते सेहतमंद परोआर- समग्र विकास दा आधार ऐ। उ'नें आखेआ जेल्लै बच्चा सेहतमंद हुंदा ऐ ते परोआर होर खुशहाल हुंदा ऐ। 2027 दी मरदमशुमारी च हिस्सा लैने आस्तै लोके गी प्रोत्साहित करने लेई अज्ज “विश्व जनसंख्या ध्याडे” दे मौके पर समूलचे जम्मू खित्ते च जागरुकता कार्यक्रमें दा सरिस्ता कीता गेआ। मुख्क मरदमशुमारी अधिकारी हुंदे दफ्तरै आसेआ इयै ने इक कार्यक्रम दे आयोजन दे मौके पर इस गल्लै पर ध्यान केन्द्रित कीता गेआ जे विकास योजनाएं लेई आबादी दे सेही आंकड़े होना मता जरूरी ऐ।

<><><><><><>

IIS Group -BLG

भारतीय सूचना सेवा IIS दे 2023 बैच दे 16 सखेतरु-अधिकारियें दा दल अज्ज लोक भवन च उपराज्यपाल मनोज सिन्हा होरें'गी जाइयै मिलेआ। इ'नें अधिकारियें कन्नै PIB श्रीनगर दे डरैक्टर काजी सलमान बी गेदे हे। उपराज्यपाल होरें इनें नौजवान अधिकारियें गी पूरी निश्ठा- जिम्मेदारी ते संजीदगी कन्नै कम्म करने दी सलाह दिंदे होई उनें'गी भविक्ख लेई शुभकामनां दितितां। उ'नें अज्ज दे डिजिटल युग च सूचना गी समें-सिर ते जिम्मेदारी कन्नै भेजने दे महत्त्व पर लौ पाई। इनें अधिकारिएं एल.जी होरें'गी जम्मू-कश्मीर दे बक्ख-बक्ख हिस्सें च कम्म करने दे अनुभव बी सांझे कीते।

OGW Arrested

श्री अमरनाथ जी यात्रा दौरान अनंतनाग पुलिस ने शनिवारें इक कथित ओर ग्राउंड वर्कर गी फगड़ेआ ऐ। चेहरे दी पंछान प्रणाली (FRS) ने पैहलगाम दे नुनवान बेस कैम्प दे x-Ray Point पर रीयल –टाइम अलर्ट जारी कीता। पुलिसा नै फौरी तौरा पर अलर्ट पर कारवाई करदे होई संदिग्ध गी रोकी लैता ते ओहदी पुच्छ-गिच्छ कीती, जेहदे मगरा एह पुष्टि होई जे ओह इक ओवर ग्राउंड वर्कर ऐ। अगरे दी कनूनी कारवाई ते विस्तृत जांच आस्तै संदिग्ध गी हिरासत च लेई लैता गेआ।

<><><><><><>

Typhoon Bavi

समुन्द्री तूफान Bavi अज्ज चीन दे पूर्वी समुन्दर थमां गुजरा करदा ऐ जेदे कारण जापान दे दक्खनी टापुएं ताईवान ते पूर्वी चीन च बड़ी भारी बरखा ते अंधी चला करदी ऐ। समुन्द्री तूफान कारण हवा 144 किलोमीटर प्रति घैंटे दी रफ्तार कन्नै चला करदी ऐ। जापान च 2 सौ कोला बद्ध डोआरियें गी रद्द करी दिता गेआ ते प्रशासन नै तूफान दे होर तेज होने ते बड्डी समुन्द्री लैहरे दी चेतावनी जारी कीती ऐ। ताईवान च स्कूल ते सरकारी दफ्तर बंद करी दिते गे न। प्रशासन नै जानकारी दिती ऐ जे अजें तोड़ी 36 लोक घाऽल होए न ते 14 ज्हार लोकें गी सुरक्षित थाहरें पजाया गेआ ऐ। तोंआई चीन नै समुन्द्री तूफान गितै ऑरेंज अलर्ट ते बारी बरखा गितै रैड अलर्ट चेतावनी जारी कीती ऐ।

<><><><><><>

Weather

भारतीय मौसम मैहकमे नै अगले 4 थमां 5 दिनें तोड़ी भारत दे उत्तरी ते पूर्वी हिस्सें च बड़ी भारी बरखा पौने दी संभावना जताई ऐ। आकाशवाणी समाचार कन्नै गल्लबात करदे होई मौसम मैहकमे दे वैज्ञानिक डाक्टर नरेश होरें आखेआ जे उत्तर पूर्वी भारत दे केई हिस्सें च 12 सेंटीमीटर थमां बद्ध बरखा पेई सकदी ऐ। उ'नें आखेआ जे अल-नीनो दे प्रभाव कारण मुल्खे दी बरसांती आले मौसम पर माड़ा प्रभाव पेआ ऐ ते हून बरसांत सामान्य थमां घट्ट रौहने दी संभावना ऐ।

तोंआई अज्जै थमां जम्मू-कश्मीर च ताजा बरखा ते अंधी-झक्खड़ पौने दी पेशनगोई कीती ऐ। विभाग नै अगले 2 शा त्रै घैंटे च पुछ-राजौरी-रामबन-डोडा-रियासी-उधमपुर ते आले-दोआले दे इलाकें च बरखा ते गरज-चमक होने दी पेशनगोई कीती ऐ। मैहकमे दा आखना ऐ जे प्रदेश दे मते सारे हिस्सें च अज्ज ते कल इक जां दंऊ बारी भारी बरखा पेई सकदी ऐ।

मैहकमे नै इस दरान खतरे दी शैका आले इलाकें,खासतौर उप्पक चिनाऽ घाटी ते पीर पीर पंचाल खित्ते च चानचक्क हाड़ औने ते ल्हास पस्सियां पौने दी चेतावनी जारी कीती ऐ।

<><><><><><>

Hyderabad Bullet Train HUB

रेल मंत्री अश्विनी वैष्णव होरें अज्ज घोषणा कीती जे हैदराबाद गी इक प्रमुख हाई स्पीड रेल तंत्र दे तौरा पर विकसित कीता जाग- जित्थुआ पुणे-चिन्नेई ते बैंगलुरु गितै बुलेट ट्रेन दे कारीडोर बनाए जागंन। हैदराबाद च इक औद्योगिक समारोह च बोलदे होई श्री वैष्णव होरें आखेआ जे इनें हाई स्पीड रेल सरिस्ते कन्नै दक्खनी भारत दे मुख आर्थिक केन्द्रें बश्कार यात्रा दा समें चिगड़ा होग ते सम्पर्क होर मजबूत होग।

<><><><><><>

US-Iran

ईरान आसेआ इस हफ्ते Strait of Hormuz च कारोबारी समुन्द्री जहाज पर कीते गेदे जवाब च अमरीका नै ईरान उप्पर नमीं बंदिशां लाइयां न- जेदे च मुल्खै दे नेतृत्व कन्नै जुडे दे व्यक्तियें ते माली सरिस्ते गी निशाना बनाया गेआ ऐ। इनें ताजा बंदिशें कन्नै अमरीका ते ईरान बश्कार तनोतनी होर बदी गई ऐ।

<><><><><><>

Archery

ज्योति सुरेशा वेन्नम प्रिथिका प्रदीप ते चिकिथा तनीपार्थी नै स्पेन दे मैड्रिड च आयोजित तीर-अंदाजी विश्व कप स्टेज 4 दी महिला कम्पाउंड टीम स्पर्धा च शानदार प्रदर्शन करदे होई चांदी दा तगमा जितेआ ऐ। फाइनल मुकाबले च भारतीय टीम गी कोलंबिया दे खलाफ 228-232 कन्नै हार दा सामना करना पेआ। भारतीय महिला कम्पाउंड टीम नै इस बरे दी शुरुआत च मैक्सिको च खेड्डे गेदे विश्व कप स्टेज-वन च सुन्ने दा तगमा बी जितेया हा। मैड्रिड च आयोजित इस टूर्नामैन्ट च कोलंबिया दी टीम दा प्रदर्शन जबरदस्त रेहा ते उन्नै बड्डे करीबी मुकाबले च भारत गी रहाइयै सुन्ने दा तगमा अपने नांऽ कीता। इस जित्त दे कन्नै गै भारतीय महिला टीम नै अंतराष्ट्रीय स्तर पर अपना प्रदर्शन जारी रखेया ऐ।

<><><><><><>